

Encuretg persunal da sesiun

Las pendicularas han fadigia da recrutar persunal

DAD ANDREAS CADONAU / ANR

■ **Las pendicularas grischunas sentan la buna situaziun economica era dad in'otra vart. Ellas han fadigia da recrutar persunal per la proxima stagiun che stat avon porta. Curclar ils basegns dalla gastronomia ei para nuot'aschi sempel.** S'avischina il meins december sedifferenzieschan las preferenzas dils gestiunaris dallas pendicularas buca fetg. Il giavisch per temperaturass bassas e neiv dominescha. Momentan fatschenta aunc in auter problem in ni l'auter directur. La tscherca da persunal, principalmein per la gastronomia, ei aunc mai stada aschi stentusa, ha il meinafatschenta dallas pendicularas da Breil/Vuorz/Andiast, *Beat Zenklusen*, dau d'entellir. Cunzun cuschinieras e cuschiniers paran dad esser ina raritad. Persunal indigen aschia ni aschia. Zenklusen ha getg d'aver recrutau dabia persunal per la gastronomia en las tiaras digl ost. Persunal bein scolau e disaus da luvrar ella gastronomia. Impurton per il directur dalla pendicularas BVA ein las habilitads linguisticas dil persunal pertuccont il lungatg tudestg. Zenklusen fa buca diever dad interpresas ch'intermedieschan persunal. El ha tschintschau da contacts persunals che gidien dad anflar il persunal garegiu. Tut en tut engascha Zenklusen 70 emploiadas ed emploiats per la sesiun d'unviern. Empau dapli persunal da sesiun basegna il menaschi dalla Arena da skis Andermatt-Sedrun. Entrass igl augment dil territori da skis ei il diember da persunal carschius sin 450 persunas. Principalmein dalla vart dad Andermatt ei la tscherca da persunal buca sempel, ha *Silvio Schmid* dau d'entellir. Era cheu ha la gastronomia la pli gronda breigia dad anflar avunda emploiadas ed emploiats per la proxima se-



E medemamein bi sche persunal qualificau po survir a vus. La tscherca da persunal dalla gastronomia ei per las pendicularas momentan buca sempel.

FOTO A. CADONAU

siun d'unviern. Ina part dalla problematica attribuescha il directur dalla Arena da skis Andermatt-Sedrun alla munconza d'albiert dalla vart dad Andermatt per emploiadas ed emploiats.

Persunal dil fatg

Tiel persunal engaschaus vid runals e sutteras ei la situaziun meins problematica, ha Schmid accentuau. Meins sempel seigi ei dad anflar persunas da cader, buns posts cun ina certa responsabladad seigien buca dad occupar, ha Schmid dau d'entellir. Avon paucs onns eri ei

pusseivel dad eleger denter pliras annunzias enaquella che las pendicularas revien ina piazza sur onn. Oz stoppion ins esser leds sch'insumma enzatgi s'annunzi sin ina piazza. Schmid ha menziunau dad encurir adumbatten in electricist da menaschi. Bein dad occupar vegnan las pendicularas las piazzas da maschinas da pista e da specialists dil spindrament. Tuttina ei la damonda era en quei sector pli gronda che la purschida. Zenklusen ha menziunau la situaziun da pli baul nua che biars pers surprindevien in'incarica parziala du-

ront igl unviern tier las pendicularas. Quels purs al runal e surgera seigien bunamein svani. Ina consequenza dallas midadas structuralas dall'agricultura cun ina digren da menaschis. Ils menaschis agricols restonts ein carschi ed ils purs occupai stedi cun la lavur sin igl agen menaschi. Zenklusen ei leds dad in ni l'auter pensiunau prompts da luvrar silmeins parzial durton la stagiun d'unviern. Damondas da persunal vi ni neu. Tec a tec fatschenta l'aura pli probabel tuttina pli fetg ils directurs dallas pendicularas.

In viadi tras stagiuns e temps

Martin Fontana ha prelegiu a Flem ord sia ovra «Denter las alas dil temps»

■ **(anr/ac) La Cuminonza romontscha da Flem ha envidau il vendergis vargau ad ina prelecziun da Martin Fontana. Igl autur ha purschiu in schatg da sia ovra «Denter las alas dil temps» per romontsch e tudestg. Sias explicaziuns ein vegnidass enramadas visualmein dallas fotografias da Johann Clopath.** *Martin Fontana* ha tschintschau dad in giug da casa il vendergis vargau avon in numerus publicum presents el stabiliment dalla pleiv evangelica a Flem. Ed el ha exprimiu sia speranza da buca piarder quei giug ed il plascher dalla preschientscha ed igl interess viers sia prelecziun. Si'ovra «Denter las alas dil temps» che secumpona da diversas poesias e versets per romontsch e tu-

destg ha Fontana dad ina vart valetau sco viadi tras la stagiuns. Ei ha buca dvrau bia prelecziun davart digl autur per capir sia stedia preschientscha ella natira ch'el ha numnau sco in'impurtona fontauna dall'atgna creativitat. Quei vala pli probabel era per *Johann Clopath* ch'ha cun diversas fotografias sutastrihau a moda visuala las remas da Fontana. Igl autur vesa si'ovra denton era sco viadi tras il temps ambivalent. Porscher in impuls per retener in mumentin era enteifer il travagl da mintgagi nua ch'il temps ed ils muments per reflexziun e paus paran buca dad esser avon maun. Fontana ha prelegiu per romontsch e tudestg ed il paregl denter las duas variantas linguisticas ei staus detg interessants.

Damai ch'igl autur ei responsabels per omisduas variantas linguisticas posseda el tutta libertad d'adattar l'explicaziun als basegns da mintga singul lungatg. Tenor Fontana tonscha il plascher da scriver buca per scaffir poesias, ei basegna in cert impuls per che la fontauna sburfla. Igl autur da «Denter las alas dil temps» tscherca en sia rema la melodia, il ritmus dil lungatg. Ed en sia prelecziun dil vendergis vargau ei Fontana suandaus las stagiuns, ha reflectau davart il Crap da Flem, ei suandaus la riva dil Rein ella vischinonza da Castrisch per serender ad ault els cuolms da Riein ed ha buca tralashau in'egliada critica e buca meins filosofica sil temps contemporan.

Rendiu attent allas activitads

Il president dalla Cuminonza romontscha da Flem, *Hanspeter Meiler*, ha medemamein giu plascher dalla stedia preschientscha alla prelecziun. Denter ils hosps ha el era astgau beneventar il president communal da Flem, *Adrian Steiger*. En sia introducziun ha el buca tralashau dad exprimer il plascher che Fontana ha giu retschiert il docter h.c. dalla Universitad da Turitg per siu engaschi en favur dalla translaziun dalla bibla. Il president dalla Cuminonza romontscha da Flem ha fatg attent allas proximas occurrenzas organisadas dalla cuminonza avon che relaschar igl auditori al puschegn spendius dalla vischnaunca da Flem.



Denter las alas dil temps ha igl autur Martin Fontana menau siu auditori il vendergis vargau a Flem.

FOTO A. CADONAU



Cun diversas fotografias ha Johann Clopath accompignau la prelecziun da Martin Fontana.

FOTO J. CLOPATH

MUSTER

Approbau il preventiv

(cp) Il cussegl da vischnaunca da Mustér ha tractau ed approbau il venderdis vargau il preventiv 2019 e la damonda da credit per ina remisa pil menaschi tecnic a Sogn Placi. La tractaziun dil preventiv 2019 dil cussegl communal dalla vischnaunca da Mustér ei vegnida tgamnada dil vicepresidente *Armin Berther*. Il quen da gudogn e sperdita dalla vischnaunca preveda expensas da 15,40 milliuns francs ed entradas da 15,58 milliuns francs. Aschia seresulta in surpli d'entradas da 180 000 francs. Dallas investiziuns nettas da rodund 2,91 milliuns francs pertuccan rodund 455 000 francs las vias cantunales e communalas ed 1,16 milliuns francs la dismesa e purificaziun dall'aua (canalisaziun e sereveras). Per projects forestals (avertura uaul Run e la Via Sars-Brulf) ei previu d'investar netto 330 000 francs. Il cash-flow munta ad 1,52 milliuns francs. Il cussegl da vischnaunca ha suenter ina buna e fundada discussiun approbau unanimamein il preventiv 2019, fixau il pei da taglia sin entradas e facultad sin 120% e la taglia sin schischom sin 1,7% (sco entochen dacheu). Plinavon ha il cussegl concediu il credit net da 216 000 francs per ereger a Sogn Placi ina remisa pil menaschi tecnic communal. Omisduas decisiuns dil cussegl ein sutmessas al referendum facultativ conform ad art. 21, lit.a dalla constituziun communal da vischnaunca da Mustér.



Il president Stefan Bühler (Ediziuns Desertina) surdat il presidi da l'uniun ad Anita Capaul (Chasa Editura Rumantscha).

FOTO P. DE JONG

Uniun d'editurs da cudeschs dal Grischun cun nov presidi

■ (cp) Tar sia radunanza generala ha l'uniun dals editurs «Cudeschs dal Grischun» elegi *Anita Capaul* da la Chasa Editura Rumantscha sco presidenta. *Stefan Bühler* (Ediziuns Desertina) ha surdà suenter passa 20 onns il presidi. Sco presidenta da l'uniun vegn Anita Capaul ad esser responsabla en l'avegnir ensemen cun la suprastanza per acciuns da reclama e marketing a favur dal cudesch grischun. En l'uniun, ch'i dat dapi il 1991, èn organisads 11 commembers. La suprastanza organisascha per las diversas chasas edituras plattafurmas da preschientscha, sco tranter auter mintga onn a l'exposiziun da cudeschs a Frankfurt. Cun integrar la marca da product «graubündenBOOKS» ha l'uniun ina buna basa per rinforzar la preschientscha.

En pli hajan ils commembers approvà novs statuts. Da nov è il num da l'uniun «Bücher aus Graubünden, Cudeschs dal Grischun, Libri dei Grigioni». Vitiers vegn da nov averta la commembranza per chasas edituras extrachantunales che publicgeschan sur dal Grischun.

Suenter la radunanza generala èn diversas chasas edituras vegnidass envidadas ad in'occurrnza da promoziun en la biblioteca da la citad a Cuira. Finamira è da gudagnar commembers novs. Sco referent ospitant ha *Gieri Spescha*, mainafatschenta da la marca «graubünden», explitgà la muntada e las pussaivladads da la marca per il chantun ed en spezial per editurs.